

15 tahun tak selesai

Adun mohon beri masa, sedia rangka penyelesaian jangka panjang untuk banjir kilat

■ NORAFIZA JAAFAR

SELAYANG - "Beri kami masa, masalah banjir kilat bukan boleh diselesaikan dalam satu atau dua hari saja, tapi perlukan kajian menyeluruh," demikian reaksi Adun Taman Templer, Zaidy Abdul Talib berkenaan kekerapan banjir kilat berlaku di Selayang Baru setiap kali hujan.

Menurutnya, masalah tersebut berlarutan hampir 15 tahun dan tindakan segera telah diambil namun tidak dapat diselesaikan secara menyeluruh.

"Penyelenggaraan berkala ada dilakukan terutama di lokasi hotspot, tapi masalah itu selesai sekejap saja, kemudian berulang. Masalah banjir kilat tak sama seperti sampah, jika sampah kita buang selesai, tapi bila melibatkan banjir banyak fak-



Penduduk Selayang Baru terpaksa berhadapan dengan masalah banjir kilat setiap kali hujan lebat.

tor yang perlu dikaji.

"Antaranya longkang lama dan kecil tak dapat tampung air banyak dalam satu masa. Ada juga antaranya longkang tak bercantum, jadi aliran air tersekut dan melimpah ke jalan. Perkara itu semua perlu disemak," katanya.

Katanya, selain penyelesaian jangka masa pen-

dek, satu rangka penyelesaian jangka panjang turut dilakukan termasuklah peruntukan RM800,000 untuk kajian sistem saliran Selayang Baru.

"Sebanyak RM6.8 juta pula telah dikeluarkan untuk naik taraf Sungai Udang termasuklah pembesaran saluran air yang bersempadanan antara Selayang dan Kuala

Lumpur, iaitu lokasi utama penyumbang kepada limpahan air setiap kali hujan lebat.

"Projek sudah berjalan tahun ini dan sedikit sebanyak mampu selesai banjir kilat di sini. Tahun depan juga ada peruntukan untuk kolam takungan bagi mengurangkan lagi masalah tersebut," katanya.

Katanya, pihaknya maklum dengan masalah dihadapi dan telah mengambil tindakan bersesuaian bagi menyelesaikan aduan.

"JPS juga telah buat penyelenggaraan sungai berkala bagi hadapi musim hujan. Penduduk perlu bersabar sedikit, aduan mereka kita maklum," katanya.

Hujan lebat Jumaat lalu menyebabkan banjir kilat berulang sejak 15 tahun dahulu terutama melibatkan Jalan 23 dan 61.